

《無相思塵論》 CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 31, No. 1619

No. 1619

無相思塵論

陳那菩薩造

陳西印度三藏法師真諦譯

若說隣虛	是根本因	不似起故
非境如根	識似聚起	不從彼生
聚無有體	譬如二月	由此二義
外物非塵	有說隣虛	聚成萬物
識似彼起	故立為塵	隣虛體相
若是實有	識不似故	非境如塵
隣虛若塵	則識無別	若言相異
則識不同	異相在假	故體非真
隣虛體量	眾處無別	若除隣虛
萬識不起	是故萬物	悉是假名
於內塵相	如外而顯	立為識塵
識似現故	是識緣緣	隨生決定
共立功能	令次第起	二根共生
勝能為根	於識無礙	更互為因
勝能為塵	互生無始	

若有人執眼等六識。緣外境起。是人或分別隣虛為境。是識因故。或分別隣虛聚為境。似聚識起故塵者何相。若識能了別其體相。如其體相識起。是故說此名塵。隣虛無此事。若隣虛實是識因譬如五根。是故隣虛非塵。若爾隣虛聚應是境。如聚識起故。雖復如此如其相起。識不從此生。是故聚亦非塵。何以故。若塵能生識。似其體相可信為塵。何以故。可說此塵為識生緣故。聚者則不如此。非實有故。譬如二月由眼根亂。識似二月起二月非。識境界實無有故。聚亦如此。離隣虛無有實體故。聚非識境界。是故外塵。由此二義非識境界。一一分不具故。有諸師說。是隣虛聚集成萬物。有多種相具足。立此為境界。何以故。有別相能生證智。非但隣虛及隣虛聚。是故於隣虛及隣虛聚中。有相為六識作境隣虛相者非塵。譬如堅等。隣虛中有堅濕熱動觸。此物實有非眼識境界。眼識不如其起故。隣虛中萬物亦如此。何以故。隣虛者於萬物中若生識。是識則無差別。以萬物中隣虛無有異故。若汝言由相差別故生識異。

瓶等諸物相貌不同。緣此相故起識有異。是義不然。何以故。如此相貌差別。於瓶等假名物中。不無於隣虛。實物中則無隣虛。體量不異故。於萬物中隣虛體量。所謂圓細無有差別。是故萬物相貌非是實有。是假名有。是假名相者。謂瓶等諸物。若除隣虛。似瓶等識不生故。實物者。若析相應法似實物識不滅。如未析時。於瓶中五塵識生。析竟五塵識亦不滅故。五塵等是實有由此隣虛及聚。萬物不能生識。是故外塵非識境界。若爾何法名塵。於內塵相如外顯現。是名識塵外塵實無所有。於內識中眾生亂心分別故。起六塵分別。此分別如在於外。如此顯現。是四緣中名識緣緣。以是識體相故由此識生故。所以者何。是識作內塵相。從內塵生。具二法故。是故內塵名境界。問曰。如塵起識是亦可然。內塵是識一分共一時起。云何得作緣緣。答曰。立緣緣者。識緣此生無有二故。緣者或一時共起。能成餘法從他生。決定隨逐生不生故。問若次第生所緣能緣相云何。答曰。若因在前果在後。果隨因因不隨果。若因有果必有。若因無果必無。果隨因或有或無。是名因果相。復次為安置功能次第故。立所緣能緣。是似塵識次第起為生。似果起功能生識相續。問曰。若內塵是識。緣緣是緣生。經當云何釋經言依根緣色眼識得生。廣說如經。答曰。功能體相能共造果。說名為根。問根者體用云何答勝能為體。此體因何法可比度知。有由生自果故。是其勝能可得了別。非有四大色此功能於識中無有妨礙。此功能在識中離識。其體不可顯示。如我所立根與汝所立根。同功能為體。此有何異。如此功能及似塵相。更互為因。如此功能及似塵相生從無始來悉爾。依功能說名根緣內塵相名境。是亂識不可言其相。得生此法更互為因亦無有始。何以故。或功能成熟故起似塵識。或似塵識故功能得成。識者或異二或不異二或不可說。如此內塵具二法故可為識境

無相思塵論